



KENYATAAN MEDIA

KEMENTERIAN EKONOMI
JABATAN PERANGKAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

PERANGKAAN DEMOGRAFI MALAYSIA, SUKU TAHUN PERTAMA 2025

BILANGAN KELAHIRAN MENURUN 11.5 PERATUS KEPADA 93,500, TERENDAH PERNAH DIREKODKAN

PUTRAJAYA, 14 MEI 2025 - Jabatan Perangkaan Malaysia telah mengeluarkan laporan berkaitan Perangkaan Demografi yang memaparkan data kelahiran hidup, kematian dan penduduk bagi suku tahun pertama 2025.

Mengulas laporan tersebut, Ketua Perangkawan Malaysia, Dato' Sri Dr. Mohd Uzir Mahidin menyatakan, "Jumlah kelahiran hidup merekodkan penurunan sebanyak 11.5 peratus kepada 93,500 kelahiran berbanding 105,613 kelahiran pada suku tahun pertama 2024. Bayi lelaki melebihi bayi perempuan dengan 48,124 kelahiran berbanding 45,376 kelahiran. Nisbah jantina bagi kelahiran hidup ialah 106 lelaki bagi setiap 100 perempuan. Selangor merekodkan bilangan kelahiran hidup tertinggi dengan 18,254 kelahiran (19.5%) manakala kelahiran hidup terendah direkodkan di Wilayah Persekutuan Labuan dengan 278 kelahiran (0.3%). Ibu berumur 30-39 tahun mencatatkan kelahiran hidup tertinggi dengan 49,816 kelahiran (53.3%), diikuti oleh ibu berumur 20-29 tahun (39.3%), 40 tahun dan lebih (6.0%) dan kurang daripada 20 tahun (1.4%). Terdapat tiga kelahiran yang direkodkan oleh ibu berumur 55 tahun dan lebih. Secara purata, seorang bayi dilahirkan pada setiap minit, 43 bayi bagi setiap jam dan 1,039 bayi sehari pada suku tahun pertama 2025".

Dari segi etnik, Melayu menyumbang 68.8 peratus (64,326 kelahiran) daripada jumlah kelahiran hidup pada suku tahun pertama 2025 (ST1 2024: 67.5%).

Kelahiran hidup bagi Bumiputera Lain meningkat kepada 12.6 peratus berbanding 12.3 peratus pada suku tahun pertama 2024. Sementara itu, etnik Cina dan India masing-masing menurun kepada 8.6 peratus dan 3.8 peratus berbanding 9.6 peratus dan 4.2 peratus pada suku tahun pertama 2024. Bumiputera Lain terdiri daripada Bumiputera Sabah, Bumiputera Sarawak dan Bumiputera Semenanjung Malaysia lain. Bumiputera Sabah menyumbang 58.8 peratus daripada Bumiputera Lain yang terdiri daripada Kadazan/ Dusun (34.5%), Bajau (30.4%), Murut (7.3%) dan Bumiputera Sabah lain (27.8%). Sementara itu, Bumiputera Sarawak merekodkan 34.6 peratus yang terdiri daripada Iban (58.7%), Bidayuh (16.0%), Melanau (12.6%) dan Bumiputera Sarawak lain (12.7%).

Mengulas lanjut, sebanyak 48,130 kematian telah direkodkan pada suku tahun pertama 2025, menurun 2.0 peratus berbanding suku tahun pertama 2024 (49,117 kematian). Bilangan kematian bagi lelaki adalah 27,533 manakala 20,597 kematian bagi perempuan. Nisbah jantina bagi kematian ialah 134 lelaki bagi setiap 100 perempuan. Selangor merekodkan bilangan kematian tertinggi dengan 7,710 kematian (16.0%) manakala Wilayah Persekutuan Putrajaya merekodkan bilangan kematian terendah dengan 84 kematian (0.2%). Penduduk berumur 60 tahun dan lebih merekodkan bilangan tertinggi dengan 34,468 kematian (71.6%), diikuti 41-59 tahun (19.6%), 15-40 tahun (6.8%) dan 0-14 tahun (1.9%). Terdapat 5.5 peratus kematian bagi penduduk berumur 90 tahun dan lebih. Secara purata, satu kematian direkodkan pada setiap dua minit, manakala 22 kematian direkodkan setiap jam dan 535 kematian sehari pada suku tahun pertama 2025.

Dari segi etnik, Melayu menyumbang 51.7 peratus (24,865 kematian) daripada jumlah kematian (ST1 2024: 51.3%). Kematian bagi Bumiputera Lain meningkat kepada 10.7 peratus berbanding 10.5 peratus pada suku tahun pertama 2024. Sementara itu, etnik Cina dan India masing-masing menurun kepada 26.8 peratus dan 8.4 peratus berbanding 26.9 peratus dan 8.6 peratus pada suku tahun pertama 2024. Bumiputera Sabah menyumbang 51.5 peratus daripada Bumiputera Lain yang terdiri daripada Kadazan/ Dusun (38.4%), Bajau (26.2%), Murut (6.7%) dan Bumiputera Sabah lain (28.7%). Sementara itu, Bumiputera Sarawak merekodkan 42.2 peratus yang terdiri daripada Iban (61.5%), Bidayuh (16.5%), Melanau (11.9%) dan Bumiputera Sarawak lain (10.1%).

Ketua Perangkawan Malaysia turut menyatakan, “Seiring dengan penurunan kelahiran pada suku tahun pertama 2025, penduduk Malaysia dianggarkan 34.2 juta berbanding 33.9 juta pada suku tahun pertama 2024 dengan pertumbuhan yang lebih perlahan dengan 0.9 peratus berbanding 2.0 peratus (ST1 2024). Jumlah penduduk terdiri daripada 30.8 juta (90.1%) Warganegara dan 3.4 juta (9.9%) Bukan Warganegara. Penduduk lelaki meningkat kepada 17.9 juta daripada 17.8 juta pada suku tahun pertama 2024 dan penduduk wanita meningkat kepada 16.2 juta daripada 16.1 juta dalam tempoh yang sama. Nisbah jantina keseluruhan penduduk ialah 111 lelaki bagi setiap 100 perempuan manakala nisbah jantina bagi Warganegara ialah 103 lelaki bagi setiap 100 perempuan. Komposisi penduduk tua (65 tahun dan lebih) meningkat daripada 7.6 peratus kepada 7.7 peratus pada suku tahun pertama 2025. Sementara itu, penduduk umur muda (0-14 tahun) merekodkan penurunan daripada 22.3 peratus kepada 22.2 peratus. Penduduk umur bekerja (15-64 tahun) kekal pada 70.1 peratus bagi tempoh yang sama.”

Melayu menyumbang 58.1 peratus daripada jumlah penduduk pada suku tahun pertama 2025 (ST1 2024: 58.0%). Penduduk etnik India menurun kepada 6.5 peratus berbanding 6.6 peratus, sementara Bumiputera Lain dan etnik Cina kekal tidak berubah iaitu masing-masing dengan 12.3 peratus dan 22.4 peratus pada tempoh yang sama. Bumiputera Sabah menyumbang 56.6 peratus daripada Bumiputera Lain yang terdiri daripada Kadazan/ Dusun (31.7%), Bajau (26.5%), Murut (5.1%) dan Bumiputera Sabah lain (36.7%). Sementara itu, Bumiputera Sarawak (32.4%) terdiri daripada Iban (59.1%), Bidayuh (17.1%), Melanau (10.6%) dan Bumiputera Sarawak lain (13.2%).

Ketua Perangkawan Malaysia turut menjelaskan, dunia ketika ini menyaksikan trend penurunan global dalam kadar kelahiran dan kadar kesuburan jumlah (TFR), di mana semakin banyak negara mencatatkan TFR di bawah paras penggantian iaitu 2.1 anak bagi setiap perempuan berumur 15-49 tahun. Fenomena ini menimbulkan cabaran besar kepada struktur demografi, pertumbuhan ekonomi dan keseimbangan sosial di peringkat global dan negara.

Beberapa negara seperti Republic of Korea, Japan, Singapore, Thailand, China dan Russia telah mengalami penurunan TFR di bawah aras penggantian, yang membawa

kepada kebimbangan mengenai penuaan penduduk, penurunan penduduk dan tenaga kerja. Pelbagai dasar berkaitan kependudukan, kesuburan dan sokongan keluarga telah diperkenalkan bagi menangani isu ini. Republic of Korea telah melanjutkan tempoh cuti bersalin kepada tiga bulan, menawarkan cuti penjagaan anak bergaji sehingga setahun, insentif kewangan dan potongan cukai bagi menggalakkan kelahiran. Selain itu, Thailand juga telah melaksanakan insentif dengan meningkatkan pengecualian cukai untuk keluarga yang mempunyai dua atau lebih anak.


Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang bertujuan untuk memperkukuh kerjasama statistik ke arah pembangunan serantau yang mampan.

Malaysia julung kalinya berjaya menduduki tempat pertama di peringkat global di dalam laporan dwitahunan Open Data Inventory (ODIN) 2024/25 dikeluarkan oleh Open Data Watch (ODW) dengan mengatasi 198 buah negara yang lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.

Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan.' Sementara itu, Hari Statistik Dunia Keempat akan disambut pada 20 Oktober 2025 dengan tema '*Driving Change with Quality Statistics and Data for Everyone*'.

OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.


Carta 1: Kelahiran hidup dan kematian (bilangan dan kadar) mengikut suku tahun, 2019-2025^p, Malaysia




Jadual 1: Statistik Demografi bagi suku tahun pertama, 2024 dan 2025, Malaysia

Tahun	Jumlah		Lelaki		Perempuan	
	ST1 2024	ST1 2025	ST1 2024	ST1 2025	ST1 2024	ST1 2025
Penduduk (juta)	33.9	34.2	17.8	17.9	16.1	16.2
Kelahiran hidup	105,613	93,500	54,442	48,124	51,171	45,376
Kematian	49,117	48,130	28,081	27,533	21,036	20,597


Carta 2: Penduduk Warganegara mengikut kumpulan etnik, suku tahun pertama 2024 dan 2025, Malaysia




Carta 3: Kelahiran hidup mengikut kumpulan etnik, suku tahun pertama 2024 dan 2025, Malaysia



Carta 4: Kematian mengikut kumpulan etnik, suku tahun pertama 2024 dan 2025, Malaysia



Carta 5: Transisi Demografi Malaysia, 1911-2023



Dikeluarkan oleh:

PEJABAT KETUA PERANGKAWAN
JABATAN PERANGKAWAN MALAYSIA
14 MEI 2025